



En pia memoria da Guido Monn-Fink

Il Guido ei naschius ils 28 da mars 1934 a Cavorgia sco fegl giuven da Turtè e Hans Giachen Monn-Bier. Leu ha el passentau ensemes cun ses 10 fargliuns ina sempla mobiala affonza. Sco ei fuva da lezs temps ellas famiglias da purs, ha ei era giu baul num per el da segidar sil menaschi puril. La stad mava el cun ses frars pli vegls ad alp sco fumegli pign. Ils emprems onns da scola ha el visitau ensemes cun siu cumpogn Ignazi Schmid

l'universitat da Cavorgia, sco el scheva mintgaton cun in surrir. La scola secundara ha el frequentau a Camischolas. Quei muntava per ils scolars da far mintga di il liung viadi a pei da Cavorgia ed anavos e quei da tutt'aura.

Suenter ils onns da scola ei il Guido serendius a Reichenburg/SZ nua ch'el ha absolviu igl emprendissadi da seller (Sattler). Suenter haver luvrau in per onns egl jester eis el turnaus anavos en sia patria. Cun la mort dil bab Hans ha el decidiu da menar ensemes cun sia mumma Turtè il fatg puril da cauras. Pli tard ha el survegniu ina buna plazza tier la KVR sco maschinist nua ch'el ei staus fideivels duront 37 onns.

Da buob en plazza giu Surrein



Il di dalla fiesta dil Sogn Rusari 1963 ha el empriu d'enconuscher sia duna Ottilia che luvrava ella Pensiu Soliva. In onn pli tard maridan els e la naschientscha da lur treis affons, Silvano, Renato e Teresina ha cumpleatau lur cletg. Igl onn 1969 ei la giuvna famiglia secasada en lur casa nova a Camischolas.

Siu temps liber passentava el bugen ella natira. Aschia eisi sedau ch'el ha fatg la patenta da catscha. Quei temps passentava el ensemen cun ses frars en sia tegia a Pardatsch. Aunc pli bugen observava el ils animals ella natira ni haveva quitau dad els cun far tgira. Cun grond engaschi eis el staus sis onns cau da tgira tier la secziun Badus e silsuenter sis onns president dil district da tgira I dall'uniuon da catschadurs dil cantun Grischun BKPJV. Il Guido gudeva era las spassegiadas en nos bials uauls e ses egls tarlischavan cura ch'el anflava entgins bulius. Encurir cristallas ni ir a pesca ein dus ulteriurs mussaments ch'el schazegiava il scaffiment.



**Sur liung lemps
en plazza tier la KVR**



**Il Guido (seniester)
gudeva il temps
da catscha en
gruppa.**

Ina ga ad onn passentava l'entira famiglia ensem en vacanzas en Svizra ni egl exteriur. Da quellas restan a nus bia bialas regurdientschas.

Pli tard ein ses tschun biadis e sia pintga biadia naschi. Pil tat ein els stai in grond plascher ed els fuvan sia pli gronda luschezia. El ha passentau bia bialas uras ensem en sia «Tegia Guido» enta Pardatsch. Quella haveva el renovau duront bia uras ensem en sia dunna e famiglia. El era bugen en siu carezau Pardatsch e las uras ch'el ha passentau leu en cun plascher ein nundumbreivlas.

Igl onn 1999 eis el ius en sia meritada pensiun. El ha astgau guder duront 26 onns in bi temps en sia cara dunna Ottilia. Adina puspei ha el menziunau ch'el seigi engrazieivels per quels bials onns. La stad fagevan els pintgas excursiuns e viadis u persuls mo era en enconuschents ni confamigliars. Igl unviern s'entupava il Guido en ses collegas a Milez sin pista. Els eran huslis skiunzs ed ei vegneva lu bu fatg pausa - il cuntrari, pil pli mava ei ina lingia naven dil Cuolm tochen Milez.

Avon che turnar a casa fagevan els la sera en paus si Planatsch ni ina storta vi el Sudada. Segiramein han els giu bein enqual legra ura da cumpignia. Cu el ha calau dad ir en skis, mava el mintga di a far ina spassegiada e selegrava da s'entupar en in ni l'auter. Lu deva nies bab bugen ina buna paterlada en pign e grond. Las davosas stads ha el fatg ensem en sia consorta bia bialas excursiuns en tren ed auto da posta pigl entr cantun Grischun entuorn.

Il davos temps eis el vegnius empau pli ruasseivels. Avon treis meins ha sia sanadad schau suenter ed el ei vegnius pli fleivels. Ei vegn constatau ina maligna malsogna, la quala el supporta en fermezia e senza selamentar. Suenter cuorta dimora el Spital Cantunal ha el passentau ses davos dis ella Casa Puntreis a Mustér, nua ch'el ei vegnius tgiraus en grond engaschi e bia carezia.

Car mariu, bab e tat, engraziel fetg per tut il bien che ti has fatg per nus. Ti restas perpeten en nos cors. Las regurdientschas communablas vegnan a restar per adina.

Ruaussa en pasch.

Ottilia, Silvano, Renato e Teresina en famiglias